



UKA 2018/150
25. oktober 2018
Bentiaraq Ottosen

Qanoq ililluta nunatta iluani timersornikkut pitsanngorsaallutalu ineriartortitseqqissinnaavugut? Nunatta nunanut allanut unammisartoqarnerup tungaatigut inerisaajumalluta, timersoqatigiiffiit nunatsinni pissartanngorniuttarnerit avataatigut, nunatta iluani unammisaqattaartarnerat akulikinnerulersinneqassappata taava qanoq iliuuseqartariaqarpugut? Apeqquteqaat aallaavigalugu oqallinnissamik siunnersuut.

(Inatsisartunut ilaasortaq Peter Olsen, Inuit Ataqaatigiit)

Nunatsinni timersornikkut siuarsaanissaq pillugu siunnersuut imaqarpoq, Atassummiit imatut oqaaseqarfigissavarput:

Inuiaqatigiinni kiffaangissuseqarnek tassaavoq sumiluuniit pingaaruteqarnerpaaq, inuk qitiutillugu peqqissumik inuuneqarnissaq pingaaruteqaqaaq. Kisiannili soorunalimi inuup nammineq aaliangissavaa qanoq inuuneqarusunnerluni. Assortorneqarsinnaangilaq inuk peqqissumik inuuneqartinnissaanik tamatta anguniagaqartaratta, piumassuseqarnermiiginnarpoq inuup nammineq toqqagassaqarnera.

Nunatsinni timersornikkut politikikkut attuumassuteqanngitsumik ingerlatsisoqartariaqartoq Atassummiit isumaqarpugut, aningaasaliinitsigulli sinaakkutinik pitsaasunik peqarnissaa angorusullugu. Nunat tamalaat timersornikkut siuariartuinnavittut eqqarsaatigalugit pinngitsoorneqarsinnaangilaq nunatsinni assingusumik siuarsaanissaq, nalunngilarpummi sineriatinni timersornikkut piginnaaneqarluartunik peqarluta kisiannili aningaasasaqartinnagu iliuuseqarniartarnerput ajornakusoortarpoq.

Atassummiit timersornikkut ingerlataqartuusut aamma timersornikkut aqutsisut, susasaqartullu tamaasa annertuumik nuannaarutiguarparput angusaasa taamak qaffasitsigisinnaasarnerat.

Nunatta ilaanni pinaveersaartitsilluni iliuuseqartarnek takuneqartarpoq, soorlu imigassamut ikiaroorartumut assigisaanullu aanngajaarniutinut inuusuttup, inersimasup ajoqqutigisinnaasaanik sunnertinniarnermi pinaveersaartitsinikkut timersornermi avaqqunneqarsinnaasoq ilisimalluarparput. Tamanna nunatsinni peqqissutsikkut iluaqutaalluinnartumik kinguneqartarnera takuneqarsinnaasarpoq, taamaattumik suulluuniit timersornermi kulturilerinermi suliaqartuusut pisariaqartilluinnakkatta ilagaat.

Immikkut eqqaarusutara uaniippoq: Ukioq manna nunatsinni PAN AM-ertoqarnerani aqqissuusat kusarluinnartut aamma Kalaallit Nunaata assammik arsarnermi takutitsilluarneratigut annertuumik puujunaatitatsinnik takutsitivigineqarpugut, maluginiagattali annerpaartaat uaniiginnarpoq



anigaasaliissarsiornikkut ajornakusoortitsineq. Tamanna isumaqarpunga Atassummiit isiginngitsuusaaginnarsinnaanngikkipput, pingaaruteqaqimmammi tamanna inuiaqatigiinni nuannaartunartuullunilu.

Naatsumik oqaaseqarluta oqallisissiaq ilalerparput neriuppugulli Inatsisartut oqallilluarumaartut.